

Ser'è i Deshasí di Yabi

Nos islanan, asotá pa kriminalidat, ta sklama pa alivio! Pa algun e kontesta ta mas prizon. Ma serando e delinkuente tras di trali i deshasí di e yabi lo pone un páro na krimen?

Nos institutonan penal ta yen. Arestando mas malechor lo oumentá e poblashon enkarselá. Gobièrnu tin e miones di florin nesario pa ekspandé e infrastruktura eksistente òf konstruí prizonnan nobo i paga pèrsonel adishonal di prizon?

Enkarselashon ta e solushon ku nos ta deseá? Hopi detenido ta bandoná pa nan famia i amigunan. Durante nan estadia, 85% di prisioneronan kasá ta divorsíá, i mayoria di esnan ku no ta divorsíá ta separá despues di e periodo di detenshon.

Prizon ta kita e kriminal for di kaya...**temporalmente so**. Pronto e ta bèk, mas brabu! Dikon? Ta un sekreto públiko ku e mihó skol di kriminalidat ta prizon. Nan mannan ta inaktivo, i nan mente, hopi bes, ta kashi di piká. Malechornan pasífiko, será huntu ku kriminalnan agresivo, ta bira violento—i ta adoptá e bida di krimen ora nan sali. Hende ta sigui ehèmpel di esnan ku ken nan ta anda. Beibel ta bisa: “*Esun ku anda ku hendenan sabí lo ta sabí, ma un kompañero di hende bobo lo sufri daño*” (Provèrbionan 13:20). No ta mihó pa nos sistema penal produsí suidadanonan ku tin algu pa kontribuí na nos komunidad ora nan sali, na lugá di produsí “bestianan salvahe” kla pa bolbe ataká?

Hopi hende ta asumí ku prizon ta un medida efektivu kontra aktividat ilegal. Ma esei ta e kaso? Segun sífranan, 2/3 di e detenidonan ku ta haña na libertat lo ser arestá atrobe dentro di tres aña. **Prizon no ta rehabilitá e kriminal!** Den último 30 aña, Merka su poblashon prizonero a multipliká kuater bes loke e tabata. Poko pais ta enkarselá un porsentahe asina grandi di su poblashon. Ma tòg durante e mésun 30 aña, krimen violento a oumentá 560%. **E menasa di prizon no ta prevení krimen.**

Sin duda prizon ta nesario pa protehá nos komunidad kontra **kriminalnan peligroso**. Ma segun sífranan merikano, mas òf ménos mitar di esnan tras di trali no a kometé ofensanan violento. E hendenan aki no ta un menasa pa nos komunidad. Enbes di laga nan inundá e sèlnan ku ya kaba ta yen, ta mihó pa nan haña **kastigu alternativa**.

Tin diferente alternativa. Por ehèmpel, e delinkuente por haña “huisarest”. Un opshon moderno ta obligá e kriminal pa bisti un aparato elektroniko na su kurpa ku ta notifiká outoridatnan di su parandero 24 ora pa dia; ma e no ta bai será.

Un alternativa ku hustamente ta birando mas popular na nos isla ta un programa di **servisio den komunidad**. E programa aki ta efektivu. E delinkuente ta traha i proveé pa su famia, pa nan no mester kobra ònderstant i bira un karga adishonal pa gobièrnu. E mester paga e víktima(nan) di su krimen. E ta hasi algu útil ku su mannan, desaroyá ekspertisio pa ku un ofishi, i ta sirbi nos komunidad. Nos ta apoyá e programa aki!

Un programa asina no ta yaya kriminalnan. Ta parse ku delinkuentenan ta preferá prizon. Un pèrsona ku a eksperensíá tantu enkarselashon komo un programa unda detenidonan por sali di prizon i traha den dia, a bisa di e programa, “Mester lamta tur dia, reportá regularmente, bai trabou, proveé pa famia—esei tabata muchu mas demandante ku wak televishon henter dia.” Ma esei ta siña e detenido pa ser un pèrsona responsbel!

Pa sera e kriminal i deshasí di yabi no ta rehabilit'è pasobra krimen ta originá den kurason. Beibel ta bisa, “*for di kurason ta sali pensamentu malu, matamentu, adulterio, fornikashon, ladronisia, testimonio falsu, kalumnia*” (Mateo 15:19). Krimen ta e resultado di bandoná norma i balornan. **Ningun prizon por kambia kurason di hende**. Ma un programa di servisio den komunidad, basá riba Palabra di Dios i reformashon étiko, ta reta e kriminal pa kambia di paden i lo yuda batayá kriminalidat.